

摘藻堂四庫全書薈要

集部

欽定四庫全書蒼要卷一萬四千六百九十八

集部

臨川文集卷十

宋 王安石 撰

古詩

和甫如京師徵之置酒

別孫莘老

寄丁中允

示平甫弟

憶北山送勝上人

相國寺啓同天節道場行香院觀戲者

馬上轉韻

乙巳九月登治城作

過劉貢甫

估玉

信都公家白兔

車螯二首

與平甫同賦槐

甘棠梨

獨山梅花

同昌叔賦鴈奴

老樹

賦棗

飛鴈

寓言九首

舟中讀書

和王樂道讀進士試卷

自訟

彼狂

衆人

和甫如京師微之置酒

李子將北征，貂裘解亭臯。使君擁鳴騶，出餞載酒醪。作
詩寵行色，坐客多賢豪。信知大夫才能賦，在登高陟岵
憂。未已強歌反哀號。問言歸何時，逮此冬風饕。川塗良

阻脩筮轡慎所操黃屋初啓聖萬靈歸一陶詢謀及踈
賤拔取皆時髦往矣果有合可辭州縣勞

別孫莘老

逢原未熟我已與子相知自吾得逢原知子更不疑把
手湖上舟望子欲歸時茫然乃分散獨背東南馳寥寥
西城居邂逅與子期雞鳴入省門朱墨來紛披含意不
自得強顏聊爾為會合常在夜青燈照書詩往往並衾
語至明不言疲忽忽捨我去使我當從誰送子不出門

我身方羈縻我心得自如
今與子相隨隨子至湖上
逢原所嘗嬉想見荷葉盡
北風卷寒漪已懷今日愁
更念昔日悲相逢亦何有
但有鏡中絲

寄丁中允

寶臣

人生九州間泛泛水中木
漂浮隨風波邂逅得相觸
始我與夫子得官同一州
相逢皆偶然情義乃綢繆
我於人事疎而子久矣修
磨礱以成我德大不可疇
乖離今六年念子未嘗休
豈不道相逢但得頃刻留
歡喜不滿

顏長年抱離憂古人有所思千里駕車牛如何咫尺間
而不與子遊顧惜五斗米無辜自拘囚念彼磊落者心
顏兩慙羞剡山碧榛榛剡水日夜流山行苦無巖水淺
亦可舟使君子所善來檄自可求何時子來意待子南
山頭

示平甫弟

汴渠西受崑崙水五月奔湍射黃天高淮夜入忽倒流
碕岸相看欲生鬣萬檣如山屹不動嗟我仲子行亦止

自聞留連且一月每得問訊猶千里老工取河天上落
伏礫澶沙卷無底土橋立馬望城東數日知有相逢喜
牆隅返照媚槐穀池面過雨蘓篁葦欣然把手相與閒
所願此時無一詭豈無他憂能老我付與天地從今始
閉門為謝載酒人外慕紛紛吾已矣

憶北山送勝上人

蒼藤翠木江南山激激流水兩山間山高水深魚鳥樂
車馬跡絕人長閒雲埋樵聲隔葱蒨月弄釣影臨潺湲

黃塵滿眼衣可濯夢寐惆悵何時還

相國寺啓同天節道場行香院觀戲者

侏優戲場中一貴復一賤心知本自同所以無欣怨

馬上轉韻

三月楊花迷眼白四月柳條空老碧年光如水儘東流
風物看看又到秋人世百年能幾許何須戚戚長辛苦
富貴功名自有時簞瓢捩茹亦山雌

乙巳九月登治城作

欲望鍾山岑因知冶城路躋攀隱木杪稍記曾遊處紅
沈渚上日蒼起榛中霧卽事有哀傷山川自如故

過劉貢甫

去年約子遊山陂今者仍為大梁客天旋日月不少留
稱意人間寧易得天明徑欲相就語雲雪填城萬家白
冬風吹鬣馬更驕一出何由問行迹能言竒字世已少
終欲追攀豈辭劇枕中鴻寶舊所傳飲我寧辭酒或索
吾願與子同醉醒顏狀雖殊心不隔故知今有可憐人

回首紛紛斗筭窄

估玉

潼關西山古藍田有氣鬱鬱高拄天
雄虹雌霓相結纏
晝夜不散非雲煙
秦人挾斤上其巔
視氣所出深鑿鑄
得物盈尺方且堅
以斤試叩聲泠然
持歸市上求百錢
人皆疑嗟莫愛憐
大梁老估聞不眠
操金喜取走踟躕
深藏牢包三十年
光怪隣里驚相傳
欲獻天子無由緣
朝廷昨日鐘鼓縣
呼工琢圭寘神筵
玉材細瑣不中權

賈孫抱物詔使前紅羅複疊帕紫氍發視紺碧光屬聯
詔問與價當幾千衆工讓口無敢先嗟我豈識真一作
庵
與全

信都公家白兔

水精為宮玉為田姮娥縞衣洗朱鉛宮中老兔非日浴
天使潔白宜嬋娟揚鬚弭足桂樹間桂花如霜亂後前
赤鷗相望窺不得空疑兩瞳射日丹東西跳梁自長久
天畢橫施亦何有憑光下視置罔繁衣褐紛紛漫回首

去年驚墮滁山雲出入虛莽猶無羣竒毛難臧果亦得
千里今以窮歸君空衢險幽不可返食君庭除嗟亦窘
令予得為此免謀豐草長林且遊衍

車螯二首

車螯肉甚美由美得烹燔殼以無味弃弃之能久存予
嘗憐其肉柔弱甘咀吞又嘗怪其殼有功不見論醉客
快一噉散投牆壁根寧能為收拾持用訊醫門

二

車螯肉之弱恃殼保厥身自非身有求不敢微啓唇尚
恐擲者得泥沙常埋堙往往湯火間身盡殼空存維海
錯萬物口牙且咀吞爾無如彼何可畏寧獨人無為久
自苦含匿不暴陳豁然從所如游蕩四海溘清波濯其
汗白日曬其昏死生或有在豈遽得烹燔

與平甫同賦槐

冰雪泊楚岸萬株同飄零春風都城居初見葉青青歲
行如車輪蔭翳忽滿庭秋子今在眼何時動江舲

甘棠梨

甘棠詩所歌自足誇衆果愛其凌秋霜萬玉懸磊砢園
夫盛採摘市賈爭包裹車輪動盈箱舟載輒連柁朝分
不知數暮在知幾顆但使甘有餘何傷小而楮主人捐
千金釘飯留四坐柑枰與橙栗在口亦云可都城紛華
地內熱易生火問客當此時蠲煩孰如我

獨山梅花

獨山梅花何所似半開半謝荊棘中美人零落依草木

志士顛顛守蒿蓬
亭亭孤艷帶寒日
漠漠遠香隨野風
移栽不得根
欲老回首上林顏色空

同昌叔賦鴈奴

鴻鴈無定棲
隨陽以南北
嗟哉此為奴
至性能懇惻
人將伺其殆
奴輒告之
亟舉羣寤而飛
機巧無所得
夜或以火取
奴鳴火因匿
頻驚莫我捕
顧謂奴不直
嗷嗷身百憂
泯泯衆一息
相隨入矰繳
豈不聽者惑
偷安與受給
自古有亡國
君看鴈奴篇
禍福甚明白

老樹

去年北風吹瓦裂牆頭老樹凍欲折蒼葉蔽屈忽扶疎
野禽從此相與居禽鳴無時不可數雌雄各自應律呂
我牀撥書當午眠能驚我眠聒我語古詩鳥鳴山更幽
我念不若鳴聲收但憂此物一朝去狂風還來欺老樹

賦棗

種桃昔所傳種棗予所欲在實為美果論材又良木餘
甘入鄰家尚得饒婦逐况余秋盤中快噉取饜足風包

墮朱繒日顆皺紅玉贄享古已然幽詩自宜錄緬懷青
齊間萬樹蔭平陸誰云食之昏匿知乃成俗廣庭觴聖
壽以此參肴救願比赤心投皇明儻子燭

飛鴈

鴈飛冥冥時下泊稻梁雖少江湖樂人生何必慕輕肥
辛苦將身到沙漠漢時蘇武與張騫萬里生還值偶然
丈夫許國當如此男子辭親亦可憐

寓言九首

說說古之士出必見禮樂羣游與羣飲仁義待揚摧心
疲歌舞荒耳聒米鹽濁所以後世賢絕俗乃為學

二

不得君子居而與小人游疵瑕不相摩况乃襖釁稠高
語不敢出鄙辭強顏酬始云避世患自覺日已偷如傳
一齊人以萬楚人咻云復學齊言定復不可求仁義多
在野欲從苦淹留不悲道難行所悲累身修

三

周公歌七月耕稼乃王術宣王追祖宗考牧與宮室甘
棠能聽訟召伯聖人匹後生論常高於世復何實

四

婚喪孰不供貸錢免爾縈耕收孰不給傾粟助之生物
羸我收之物窘出使營後世不務此區區挫兼并

五

貞觀業萬世經營豈非艱其子一搖之宗廟靈幾殫開
元始聰明一青犇岷山功高後毀易德薄人存難

六

言失於須臾百世不可除行失几席間惡名滿八區百
年養不足一日毀有餘諒彼恥不仁戒哉惟厥初

七

鐘鼓非樂本本末猶相因仁聲入人深孟子言之醇如
何貞觀君從古同隋陳風俗不粹美惜哉世無臣

八

遊鯨厭海濁出戲清江湄風濤助翻騰網罟不敢窺失

身洲渚間螻蟻乘其機物大苦易窮一窮無所歸

九

猛虎卧草間羣鳥從噪之萬物忌強梁寧獨以其私虎
終機械得鳥亦彈丸隨山雞不忤物默與鳳凰期

舟中讀書

冉冉木葉下蕭蕭山水秋浮雲帶田野落日抱汀洲歸
卧無與語出門何所求未能忘感慨聊以古人謀

和王樂道讀進士試卷

文章始隋唐進取歸一律安知鴻都事竟用程人物變
今嗟未能於己空自咄流波亦已漫高論常見屈故令
俶儻士往往棄堙鬱臯陶叙九德固有知人術聖世欲
爾為徐觀異人出

自訟

孔子見南子子路為不怡欲從公山氏勃鬱見色辭道
如天之蒼萬物不能緇弟子尚不信况余乏才資明知
古人仁語默各有時苟出不自慎果為聽者疑白圭尚

可磨駟馬猶能追一言成不智雖悔欲何為

彼狂

上古杳默無人聲日月不忒山川平人與鳥獸相隨行
祖孫一死十百生萬物不給乃相兵伏羲畫法作後程
漁蟲獵獸寬羣爭勢不得已當經營非以示世為聰明
方今類別物有名夸賢尚功列恥榮盡偽日巧雕元精
至言一出衆輒驚上智閉匿不敢成因時就俗救則黥
惜哉彼狂以文鳴強取色樂要聾盲震蕩沈濁終無清

詆詭徒亂聖人氓豈若泯默死蠶耕

衆人

衆人紛紛何足競是非吾喜非吾病頌聲文作莽豈賢
四國流言且猶聖唯聖人能輕重人不能銖兩為千鈞
乃知輕重不在彼要之美惡由吾身

臨川文集卷十

欽定四庫全書蒼要卷一萬四千六百九十九

集部

臨川文集卷十一

宋 王安石 撰

古詩

寄題郢州白雪樓

聖俞為狄梁公孫作詩要予同作

蒙亭

和王樂道烘蝨

和聖俞農具詩十五首

次韻酬微之贈池紙并詩

酬沖卿月晦夜有感

送子思兄參惠州軍

送董伯懿歸吉州

八月十九日試院夢沖卿

平甫歸飲

答陳正叔

過食新城藕

明州錢君倚衆樂亭

愛日

荅裴煜道中見寄

餘寒

孤城

和微之藥名勸酒

客至當飲酒二首

乙未冬婦子病至春未已

強起

飲裴侯家

送謝師宰赴任楚州二首

次韻遊山門寺望文脊山

車螯

疥

寄題郢州白雪樓

折楊黃華笑者多陽春白雪和者少知音四海無幾人

况乃區區郢中小千載相傳始欲慕一時獨唱誰能曉
古心以此分冥冥俚耳至今徒擾擾朱樓碧瓦何年有
榱桷連空欲驚矯郢人爛漫醉浮雲郢女參差躡飛鳥
丘墟餘響難再得欄檻茲名復誰表我來欲歌聲更吞
石城寒江暮雲繞

聖俞為狄梁公孫作詩要予同作

虎豹不食子鷓臬不乘雄人惡甚鳥獸吾能與成功愛
有以計留去有勢不容吾謀適合意幾亦甚姦鋒時恩

淪九泉褒取異代忠堂堂社稷臣近世孰如公空使苗裔孫稱揚得詩翁一讀亦使我慨然想餘風

蒙亭

隱者委所逢在物無不足山林與城市語道歸一轂詩人論巨細此指尚局束頗知區區者自屏忍所欲孰識古之人超然遺耳目豈於喧與靜趣舍有偏獨命亭今何為似乃畏驚俗至意不標揭閣名聊自屬夏風簷楹寒冬雪牕戶燠春樊亂梅柳秋徑深松菊壺觴日笑傲

裙屐相追逐此樂已難言持琴作新曲

和王樂道烘蟲

秋暑汗流如炙輟散衣濕蒸塵垢浣施施衆蟲當此時
擇肉甘於虎狼餓咀嚙侵膚未云已爬搔次骨終無那
時時對客輒自捫千百所除纔幾箇皮毛得氣強復活
爪甲流丹真暫破未能湯沐取一空且以火攻令少挫
踞爐熾炭已不暇對竈張衣誠未過飄零乍若蛾赴燈
驚擾端如蟻旋磨欲毆百惡死焦灼肯貸一凶生棄播

已觀細點無所容未放老奸終不墮然臍鄙塢患溢世
焚寶鹿臺身易貨冢中燎入化秦屍池上爇隨遷莽坐
彼皆勢極就煙埃况汝命輕侷涕唾逃藏壞絮尚欲索
埋沒死灰誰復課一本無此八句熏心得禍爾莫悔爛額收功
吾可賀猶殘衆蟻恨未除自計寧能久安卧

和聖俞農具詩十五首

田廬

田父結田廬聊容一身息呼兒取茅竹不借鄉人力起

行廬旁朝歸卧廬下夕悠悠各有願勿笑田廬窄

樵斧

百金聚一冶所賦以所遭此豈異莫耶奈何獨當樵朝
出在人手暮歸在人腰用捨各有時此心兩無邀

耕牛

朝耕草茫茫暮耕水滴滴朝耕及露下暮耕連月出身
無一毛利主有千箱實睨彼天上星空名豈余匹

水車

取車當要津膏潤及遠野與天常斡旋如雨自淥瀉置
心亦何有在物偶相假此理乃可言安得圓機者

牧笛

綠草無端倪牛羊在平地芊綿杳靄間落日一橫吹超
遙送逸響澶漫寫真意豈比賣錫人吹簫販童穉

颺扇

精良止如留疏惡去如擯如擯非爾憎如留豈吾吝無
心以擇物誰喜亦誰愠翁乎勤簸颺可使糠粃盡

田漏

占星昏晚中寒暑已不疑
田家更置漏寸晷亦欲知
汗與水俱滴身隨陰屢移
誰當哀此勞往往奪其時

牛衣

百獸冬自暖獨牛非
毳毛無衣與卒歲坐恐得空牢
主人覆護恩豈啻一綈袍
問爾何以報離離滿東臯

樓種

富家種論石貧家種論斗
富貧同一時傾瀉應心手
行

看萬壑空坐使千箱有利物博如此何慙在牛後

耒耜

耒耜見於易聖人取風雷不有仁智兼利端誰與聞神
農后稷死般爾相尋來山林盡百巧揉斲無良材

錢鑄

於易見耒耜於詩聞錢鑄百工聖人為此最功不薄欲
收禾黍善先去蒿萊惡願同歌器悟更使臣工作

耒耜

鍛金以為曲揉木以為直直曲相後先心手始兩得秦
人望屋食以此當金革君勿易耰耨耨勝鋒鏑

襍禩

采采霜露下披披煙雨中蒲茅以為友短褐相與同勿
妬市門人綺紈被奴僮當慙邊城戍擐甲徂春冬

臺笠

史記索隱謂
蓬累立也

耕有春雨濡耘有秋陽暴二物應時須九州同我服欲
為生少慕得此自云足君思周伯陽所願豈華韞

耘鼓

逢逢戲場聲攘攘戰時伍日落未云休田家亦良苦問
兒今壟上聽此何莽鹵昨日應官繇州前看歌舞

次韻酬微之贈池紙并詩

微之出守秋浦時椎冰看擣萬穀皮波工龜手咤今樣
魚網肯數荊州池霜紈奪色賈不售虹玉喪氣山無輝
方船穩載獻天子善價徐取供吾私十年零落尚百一
持以贈我隨清詩君寧久寄金穀地方執賜筆磨坳螭

當留此物朝上國日侍帝側書新儀不然名山副史
本褻拔元凱誅窮竒咨予文章非世用畫鏤空爾糜冰
脂揮毫才足記姓字竊學又恥從師宜忽忽點汙亦何
忍嘉貺但覺難為辭篇終有意責趙璧窮國恐誤連城
歸傾囊倒篋聊一報安敢坐以秦為堆

酬沖卿月晦夜有感

夜雲不見天况乃星與月蕭蕭暗塵走坎坎寒更發樓
歌客尚飲醕酌不畏雪巷哭復有人鄰風送幽咽紛然

各所遇悲喜孰優劣君方感莊周浩蕩擺羈縲歸來亦
置酒玉指調絃撥獨我坐無為青燈對明滅

送子思兄參惠州軍

泂泂曲江水天借九秋色樓臺飛半空秀氣盤韶石載
酒填里閭吹花換朝夕笙簫震河漢錦繡爛冠幘地靈
瘴癘絕人物傾南極先朝有名臣卧理訟隨息稍稍延
諸生談笑顧賓客子來適妙年謁入交復烏寂寥九齡
後此獨望一國虞翻禮丁覽韓愈俟趙德孤岸鎮顏波

俗流未易識我方文葆中旋逐旌旗蹟去思今豈忘耳
目熟遺迹吏含殷勤言俛仰問乖隔當時府中兒侵尋
鬢邊白下帷雖著書不抹寒饑迫謂宜門闕士官路久
烜赫奈何猶差池更捧丞掾檄驥摧千里蹄鵬墮九霄
翮人生無巧愚天運有通塞試觀馳騁人意氣宇宙窄
榮華去路塵謗辱與山積優游祿仕間較計誰失得送
君強成歌陟岵翻感激

送董伯懿歸吉州

我來以喪歸君至因謫徙蒼黃憂患中邂逅過於此去
年服初除聽赦相助喜看君數歸月但屈兩三指茫然
冬更秋一笑非願始籃輿楊柳下明月芙蓉水僮饑屢
闕門客罷方隱几是非評衆詩成敗斷前史時時對奕
石漫浪爭生死送迎皆幅巾設食但陳米亦曾戲篇章
揮翰疾蒿矢君豪才有餘我老憊先止東城景陽陌南
望長干紫欲斲三畝蔬於焉寄殘齒經過許後日唱和
猶在耳新恩忽捨我欣悵生彼己江湖北風帆捩柂即

千里相逢知何時莫惜縑與紙

八月十九日試院夢冲卿

空庭得秋長漫漫寒露入幕愁衣單
喧喧人語已成市白日未到扶桑間
永懷所好卻成夢玉色髣髴開心顏
逆知後應不復隔談笑明月相與間

平甫歸飲

無田士相吊亦以廢燕樂我官雖在朝
得飲乃不數詩書向牆戶賓至無杯杓
空取上古言醕之等糟粕有如

揚子雲歲晚天祿閣但無載酒人識字真未博叔兮歸
自東一笑堂上酌緒餘不及客兒女聊相酢高談非世
歡自慰亦不惡寄言繁華子此趣由來各

荅陳正叔

天馬志萬里駕鹽不如閒壯士困局束不如弃之完利
行有阨轍勢涉無恬瀾明明千年羞促促一日歡孰肯
避此世引身取平寬超然子有意為我歌考槃予方慕
孔氏委吏久盤桓得失未云殊聊各趨所安

過食新城藕

他年過食新城藕，枕藉船中載親友。今年却到經行處，
獨坐昏煙對舞柳。甘酸向口無所適，牢落盤餐與樽酒。
冰房玉節漫自好，欲御還休涕垂手。曾參宦學居常近，
陽城離別初不久。人間此願兩未能，西風落日空回首。

明州錢君倚衆樂亭

使君幕府開東部，名高海曲人知慕。舫船談笑政即成，
洗滌山川作嘉趣。平泉浩蕩銀河注，想見明星弄機杼。

載沙築成天上路投虹為橋取孤纈掃除荆棘水中央
碧瓦朱甍隨指顧春風滿城金甌來看置酒新亭上
百女吹笙綵鳳悲一夫伐鼓靈鼉壯安期羨門相與遊
方丈蓬萊不更求酒酣忽跨鯨魚去陳迹空令此地留

愛日

鴈生陰沙春冬息陽海滢冥冥取南北豈以食為累咨
子愁病軀朴鄙人所戲無才治時難量刀當自棄豈知
塞上霜飄然亦何事高堂已白髮愛日負明義悲風吹

平原抹馬聊一榻含懷孰與語
仰屋思嘆喟孟母知身
從萊婁恥人制一肉儻易謀
萬鍾非得計

荅裴煜道中見寄

君遊苦數歸苦晚一驛險有千里遠
知君陟降旦暮間
馬力不勁厭長坂
雨脚墜地花枝低
風頭入溪蒲葉偃
此處登臨不奈愁
瓊樹森森遮疊嶽

餘寒

餘寒駕春風入我征衣裳
捫鬚祇得凍蔽面尚疑劍士

耳恐猶墜馬毛欲吹僵
牢持有失箸疾飲無留湯
瞳瞳扶桑日出有萬里
光可憐當此時不濕地上霜
冥冥鴻鴈飛北望去成行
誰言有百鳥此鳥知陰陽
豈時有必至前識聖所臧
把酒謝高翰我知思故鄉

孤城

孤城回望

一作首

距幾何記得好處常經過
最思東山煙

樹色更憶南湖秋水波
百年顛倒

一作三年飄忽

如夢寐萬事

乖隔

一作萬事感激

徒悲歌應須飲酒不復道
今夜江頭明月

多

和微之藥名勸酒

赤車使者錦帳郎
從容珂馬留閑坊
紫芝眉宇傾一生
笑語但聞雞舌香
藥名勸酒詩實好
陟釐為我書數行
真珠的皦鳴槽牀
金罌琥珀正可嘗
史君子細看流光
莫惜覓醉衣淋浪
獨醒至死誠可傷
歡華易盡悲酸早
人間沒藥能醫老
寄言歌管衆少年
趁取烏頭未白前

客至當飲酒二首

結屋在牆陰閉門讀詩書懷我平生友山水異秦吳杖
藜出柴荆豈無馬與車窮通適異趣談笑不相愉豈復
求古人浩蕩與之俱客至當飲酒日月無根株

二

天提兩輪光環我屋角走自從紅顏時照我至白首纍
纍地上土往往平生友少年所種樹磔斲行復朽古人
有真意獨在無好醜冥冥誰與論客至當飲酒

乙未冬婦子病至春未已

天旋無窮走日月青髮能禁幾回首兒呻婦嘆冬復春
強欲笑歌難發口黃卷幽尋非貴嗜藜牀穩卧雖貧有
二物長乖亦可憐一生所得猶多苟

強起

寒堂耿不寐輓輓聞車聲不知誰家兒先我霜上行歎
息夜未央呼燈置前楹推枕欲強起問知星正明昧旦
聖所勉齊詩有雞鳴嗟予以竊食更覺負平生

飲裴侯家

裴侯飲我日向中
四坐賓客顏皆紅
掃除高館邀我入
自出糴麥憐民窮
天邊眼力破萬里
桑麻冥冥山四起
野心探尋殊未已
更欲湔衣北城水
忽見碧樹櫻桃懸
下馬恣食不論錢
赤星磊落入我眼
恐是半醉遊青天
裴侯方坐塵沙裏
役身救物當如此
我曹偶脫簿領間
何忍愛惜一日閒
且歸拂席飽眠睡
明日更看滁南山

送謝師宰赴任楚州

珠玉不自貴
故為人所憐
賢愚亦如此
好惡有自然
聞

子欲東南使我抱幽悵炎風沙土中甘與子留連大梁
非無客跪起廢食眠相看獨不厭以此知子賢衰氣已
難強壯心方少年才高豈易得勗子在雕鐫

二

昆崙一支流向東七月八月船如風愛君少壯此行樂
恨我留連成老翁神頭兩岸水無窮伏檻荷花滿地紅
當時不得君攜手今日山川在眼中

次韻遊山門寺望文脊山

宣城百山間文脊尤奇峰拔出飛鳥上圖畫難為容聞
昔有幽人捫蘿追赤松遺形此古室孤坐鹿裘重人去
邈不返洞壑空藏龍側行蒼崖煙俯仰求靈蹤遊者如
可得甘棄萬戶封安能久塵土傾倒相迎逢

車螯

海於天地間萬物無不容車螯亦其一埋沒沙水中獨
取常苦易衛生乏明聰機緘誰使然含蓄略相同坐欲
腸胃得要令湯火攻置之先生盤噉客為一空蠻夏怪

四坐不論殼之功狼籍堆左右棄置任兒童何當強收
拾持問大鑿工

疥

浮陽燥欲出陰濕與之戰燥濕相留連蟲出乃投間搔
膚血至股解衣燎鑪炭方具愜心時更自無可患呼醫
急治之莫惜千金散有樂即有苦愜心非所願

臨川文集卷十一

謹案卷九第九頁後六行不忍四海寒颼颼按四
海下別本有赤子二字颼颼別本作颼颼

卷十第七頁後四行清波濯其汗刊本濯訛躍今

改

第八頁後四行鴻鴈無定棲刊本鴻訛鴈據別本
改

第十二頁後一行白圭尚可磨刊本可訛有據別

本改

卷十一第三頁後二行空使苗裔孫刊本孫訛稱

據別本改

第四頁前三行秋暑汗流如炙輟刊本暑訛水據


別本改

第八頁後八行虞翻禮丁覽刊本覽訛汜據吳志

改

第十四頁前六行呼燈置行楹刊本呼燈訛遽呼

據別本改



總校官庶吉士臣張能照

校對官檢討臣蕭九成

謄錄監生臣劉天蒼

謄錄貢生臣江長鎰

欽定四庫全書薈要

集部

臨川文集卷十二至
十四

詳校官助教臣常循



欽定四庫全書薈要卷一萬四千七百

集部

臨川文集卷十二

宋 王安石 撰

古詩

和平甫舟中望九華山二首

和中甫兄春日有感

信陵坊有籠山樂官

收鹽

省兵



發廩

感事

美玉

寄曾子固

同杜使君飲城南

有感

送孫叔康赴御史府

別馬祕丞

到郡與同官飲

追送朱氏女弟宿木瘤僧舍

招同官遊東園

九日隨家人遊東山遂遊東園

秋懷

既別羊王二君與同官飲城南

試茗泉

躍馬泉

白紵山

七星硯

九鼎

九井

寄題衆樂亭

書會別亭

題舒州山谷寺石牛洞泉穴

和平甫舟中望九華山二首

楚越千萬山雄竒此山兼盤根雖巨壯其末乃脩纖去
縣尚百里側身勇前瞻蕭條煙嵐上縹緲浮青尖徐行
稍復逼所矚亦已添精神去疊疊氣象來漸漸卸席取
近岸移船傍蒼蕪窺觀坐窮晡未覺晷刻淹江空萬物
息四面波瀾恬哉然九女鬟爭出一鏡奩卧送秋月沒
起看朝陽暹遊氛蕩無餘瑣細得盡覘陵空翠轟直照
影寒鏗鋳冢木立紺髮崖林張紫髯變態生倏忽雖神
詎能占當留老吾身少駐誰云饜惜哉秦漢君黃屋上

衡瀟等之事嬉遊捨此何其庶我疑二后荒神物久已

厭埋藏在雲霧不欲登昏愴又疑避褻封蔽匿以為謙

或是古史書脫落簡與籤當時備巡遊今不在緗縑終

南秦之望泰山魯所詹天王與秩祭俎豆羅醢鹽苟能

澤下民維此遠亦沾方今東南旱土脈燥不黏尚無膚

寸功豈免竊食嫌神莽吾難知士病吾能砭文章巧傳

會智術工飛笳薦寶互珪璧論材自梗柎苟以飾婦妾

謬云活蒼黔豈如幽人樂茲山謝閣闔穴石作戶牖垂

泉當門簾尋竒出後徑覽勝倚前簷超然往不返舉世
徒咕咕高興寄日月千秋伴烏蟾遐追商洛翁秦火不
能炎近慕楚穆生竟脫楚人鉗吾意竊所尚人謀諒難
僉

二

誰謂九華遠吾身未嘗簷唱篇每起予予口安能拈憶
在秋浦北空江上新蟾光潔寫一鏡迴環兩堤奩露坐
引衣襟風行歌帽簷維舟當此時巨細得盡瞻試嘗論

大略次乃述微纖此山廣以深包畜萬物兼噓雲吐霧
雨生育靡不漸巍然如九皇德澤四海沾此山相後先
各出羣峰尖毅然如九官羅立在堂廉挺身百辟上附
麗無姦愴此山高且寒五月不覺炎草樹萋已綠冰霜
尚涵淹頽然如九老白髮連蒼髯此山當無雲秀色鬱
以添婉然如九女靚飾出重簾珮環與巾裙紺玉青紈
縑遠之妍西施近或醜無鹽變態不可窮詩者徒咕咕
我初勇一往役世難安恬浪荒不走職民瘼當誰砭乖

離今數旬夢想欲窺覘自期得所如何啻釋囚鉗念昔
太白巔下視海日暹竭來天柱遊夜齒尚苔黏猶之健
飲食屢饗亦云饜胡為慕攀踏已憊且不嫌豈其仁智
心山水固所潛男兒有所學進退不在占功名苟不諧
廊廟等閭閻况乃掄椽杙其誰辨椶柎歸歟巖岨居料
理帶與藪得石坐兀兀逢泉飲厭厭取舍斷在獨豈必
詢謀僉子語實慰我寧殊邑中黔玉枝將在山當倚以
葭蒹詩力我已屈鋒鏗子猶銛扶復更一戰語汝其無

謙

和中甫兄春日有感

雪釋沙輕馬蹄疾北城可遊今暇日濺濺溪谷水亂流
漠漠郊原草爭出嬌梅過雨吹爛漫幽鳥迎陽語啾唧
分香欲滿錦樹園剪綵休開寶刀室胡為我輩坐自苦
不念茲時去如失飽聞高逕動車輪甘卧空堂守經帙
淮蝗蔽天農久餓越卒圍城盜少逸至尊深拱罷蕭韶
元老相看進刀筆春風生物尚有意壯士憂民豈無術

不成歡醉但悲歌回首功名古難必

信陵坊有籠山樂官

萬里山林姿羽毛何摧摧鳴聲應律呂唯有知者愛都
門市井兒誰翫汝文采應須鎖樊籠勿受丸增害

收鹽

州家飛符來比櫛海中收鹽今復密窮囚破屋正嗟歎
吏兵操舟去復出海中諸島古不毛島夷為生今獨勞
不煎海水餓死耳誰肯坐守無亡逃爾來賊盜往往有

劫殺賈客沈其艘一民之生重天下君子忍與爭秋毫

省兵

有客語省兵兵省非所先方今將不擇獨以兵乘邊前
攻已破散後距方完堅以衆亢彼寡雖危猶幸全將既
非其才議又不得專兵少敗孰繼胡來飲秦川萬一雖
不爾省兵當何緣驕惰習已久去歸豈能田不田亦不
桑衣食猶兵然省兵豈無時施置有後前王功所由起
古有七月篇百官勤儉慈勞者已息肩游民慕草野歲

熟不在天擇將付以職省兵果有年

發廩

先王有經制頒賚上所行後世不復古貧窮主兼并非
民獨如此為國賴以成築臺尊寡婦入粟至公卿我嘗
不忍此願見井地平大意苦未就小官苟營營三年佐
荒州市有棄餓嬰駕言發富藏云以救鰥惇崎嶇山谷
間百室無一盈鄉豪已云然罷弱安可生茲地昔豐實
土沃人良耕他州或些麻貧富不難評豳詩出周公根

本詎宜輕願書七月篇一寤上聰明

感事

賤子昔在野心哀此黔首豐年不飽食水旱尚何有雖
無剽盜起萬一且不久特愁吏之為十室災八九原田
敗粟麥欲訴嗟無賅間闕幸見省笞扑隨其後况是交
冬春老弱就僵仆州家閉倉庾縣吏鞭租負鄉鄰銖兩
徵坐逮空南畝取貨官一毫姦桀已云富彼昏方怡然
自謂民父母竭來佐荒郡慄慄常漸疾昔之心所哀今

也執其咎乘田聖所勉況乃余之陋內訟敢不勤同憂
在僚友

美玉

美玉小瑕疵國工猶珍之大賢小玷缺良交豈其絕小
缺可以補小瑕可以磨不補亦不磨人為奈爾何

寄曾子固

吾少莫與合愛我君為最君名高山嶽竭孽嵩與太低
心收憇友似不讓塵壒又如滄江水不逆溝畎澮君身

揭日月遇輒破氛靄我材特窮空無用補倉廩謂宜從
君久垢污得洮汰人生不可必所願每顛沛乖離五年
餘牢落千里外投身落俗窳薄宦自鉗鉞平居每自守
高論從誰巧搖搖西南心夢想與君會思君挾竒璞願
售無良僧窮閻抱幽憂凶禍費襁襁州窮吉士少誰可
壻諸妹仍聞病連月醫藥誰可賴家貧奉養狹誰與通
貨貝詩人刺曹公賢者荷戈役奈何遭平時德澤盛汪
濊鸞鳳鳴且下萬羽來翩翩呦呦林間鹿爭出噬草籟

乃令高世士動輒遭狼狽人事既難了天理尤茫昧聖
賢多如此自古云無奈周人貴婦女扁鵲名醫滯今世
無常勢趨舍唯利害而君信斯道不閔身窮泰弃捐人
間樂濯耳受天籟諒知安肥甘未肯顧糠糲龍螭雖蟠
屈不慕蛇蟬蛻令人重感奮意勇忘身最何由日親灸
病體同砭艾功名未云合歲月尤須惕懷思切劇効中
夜淚霽霈君嘗許過我早晚治車軌山溪雖峻惡高眺
發蒙肺峯巒碧參差木樹青掩藹桐江路尤駛飛槩下

鳴瀨魚村指暮火酒舍瞻晨旆清醪足消憂玉鯽行
可膾行行願無留日夕佇傾蓋會將見顏色不復謀著
蔡延陵古君子議樂恥言鄙細事豈足論故欲論其大
披披發鞬橐慄慄見戈銳探深犯巖壁破惑翻強旌離
行步荃蘭偶坐陰松檜宵床連衾疇晝食共麕羈茲歡
何時合清瘦見衣帶作詩寄微誠誠語無綵繪

同杜使君飲城南

山公遊何處白馬鳴翩翩擅那十畝碧五月浮寒烟留

客聽其間風吹江海懸出罇不見日竹外空青天焚蠟
助月出酒光發金船狂客惜不去醉翁舞回旋何必吹
簫人玉枝自嬋娟歸路借紅燭雨星低馬前

有感

憶昔與胡子戲娛西城幽放斥僕與馬獨身步田疇牛
豎歌我旁聽之為久留一接田父語嘆之勝王侯追逐
恨不恣暮歸輒懷愁顧常輕千乘祇願足一丘子時怪
我少好此寂寞遊笙簧不入耳又不甘醪羞那知抱孤

傷罷頓不能道世味已鮮少但餘野心稠乖離今十年
斑髮滿我頭昔興亦略盡食眠常百憂每逢佳山水欲
往輒復休方壯遂如此况乃高春秋

送孫叔康赴御史府

古人喜經綸萬事慙強聒時來上青冥俯仰但一節危
言回丘山聲利盡毫末由來治亂體宿昔心已達肯隨
俗好惡議論輕自決遺風何寥寥夢寐待豪傑天書下
東南趣召赴嚴闕長材晦朝倫高行隱家闈新除醜問

望宿蘊行施設念吾非忘形此理未易說

別馬祕丞

伯夷惡一世季也皆鄉人吾嘗論夫子有似季之倫人
情路萬殊近世頗荆榛唯君遊其間坦坦得所循意君
誠愷悌慕向從宿昔奈何初相懽鷓首已云北苒苒郊
原青漠漠風雨黑冠蓋滿津亭君今去何適

到郡與同官飲

時倅舒州

瀉碧沄沄橫帶郭浮蒼靄靄遙連閣草木猶疑夏鬱蔥

風雲已見秋蕭索
荒歌野舞同醉醒
水果山肴互酬酢
自嫌多病少懽顏
獨負嘉賓此時樂

自舒州追送朱氏女弟
憩獨山館宿木瘤僧
舍明日度長安嶺至皖口

晨霜踐河梁
落日憩亭皋
念彼千里行
惻惻我心勞
攬轡上層岡
下臨百仞濠
寒流咽欲絕
魚鼈久已逃
暮行苦遭迴
細路隱蓬蒿
驚麇出馬前
鳥駭亡其曹
投僧避夜雨
古檠昏無膏
山木鳴四壁
疑身在波濤
平明長安

嶺飛雪忽滿袍天低浮雲深更覺所向高

招同官遊東園

青青石上蘂霜至亦已凋冉冉水中蒲爾生信無聊感
此歲云晚欲懽念誰邀嘉我二三子為回東城鑣幽菊
尚可泛取魚繫榆條毋為百年憂一日以逍遙

九日隨家人遊東山遂遊東園

暑往詎幾時涼歸亦云暫相隨東山樂及此身無憾聊
回清池施更伏荒城檻采采黃金花持杯為君泛

秋懷

城南平野寒多露窗壁含風秋氣度鄰桑槭槭已欲空
悲蟲啾啾促機杼柴門半掩掃鳥迹獨抱殘編與神遇
韓公既去豈能追孟子有來還不拒

既別羊王二君與同官會飲于城南因成寄

用藥名

赤車使者白頭翁當歸入見天門冬與山久別悲忽忽
澤瀉半天河漢空羊王不留行薄晚酒肉從容追路遠

臨流黃昏席未卷玉壺倒盡黃金盞羅列當辭更繾綣
預知子不空青眼嚴徐長卿誤推挽老年揮翰天子苑
送車陸續隨子返坐聽城雞腸宛轉

試茗泉

此泉地何偏陸羽曾未閱坻沙光散射竇乳甘潛洩靈
山不可見嘉草何由啜但有夢中人相隨掬明月

躍馬泉

古水縮蛟螭憎山欲墮突山祇來伐之半嶺跳鬻膝玉

珂鳴塞空組練光照日崩騰赴不測一陷常萬匹神戰
異人間千秋為儵忽泉旁往來客夜寄幽人室但聽鳴
蕭蕭何由見神物

白紵山

白紵衆山頂江湖所縈帶浮雲卷晴明可見九州外肩
輿上寒空置酒故人會峯巒帳錦繡草不吹竽籟登臨
信地險俯仰知天大留歡薄日晚起視飛鳥背殘年苦
局束往事嗟摧壞歌舞不可求桓公井空在

七星硯

余聞星墮地往往化為石石上有七星此理余莫測持
來當白日光彩不為匿恍如起鴻蒙俛仰帝垣側當由
偶然似見取參筆墨豪心蕩珍異樂以萬金得南工始
為偽傅合巧無隙亦時疑世人故自有能識

九鼎

禹行掘山走百谷蛟龍窟藏魑魅伏心誌幽妖尚覲隙
以金鑄鼎空九牧治雲赤天漲為黑韞風餘吹山拔木

鼎成聚觀變怪索夜人行歌鬼晝哭功施元元後無極
三姓衛守相傳屬弱周無人有宜出沈之九幽拆地軸
始皇區區求不得坐令神姦窺邑屋

九井

得盈字

公崖涉澗三十里高下犖确無人耕捫蘿挽葛到山趾
仰見吹瀉何崢嶸餘聲投林欲風雨末勢卷土猶溪坑
飛蟲凌兢走獸慄霜雪夏落雷冬鳴野人往往見神物
鱗甲漠漠雲隨行我來立久無所得空數石上菖蒲生

中官繫龍沈玉冊小吏磔狗澆銀觥地形偶爾藏險怪
天意未必司陰晴山川在理有崩竭丘壑自古相虛盈
誰能保此千世後天柱不折泉常傾

寄題衆樂亭

陵陽遊觀吾所好恨不即過衆樂亭嘗聞髣髴入夢寐
吟筆自欲圖丹青千峰秀出百里外忽於其上崢嶸楹
朝雲嘔啞日暖暖夜水落澗風泠泠春花窈窕鳥爭舞
夏木蔭鬱猿哀鳴潦收葉落天地爽海月影到山川明

籃輿晨出誰與適坐與萬物觀虛盈令思民事不忍後
田間笑語催蠶耕吏休歸舍獄訟少墟落飲酒欲秋成
唯愁一日奪令去出來老稚交逢迎彼民安知方祿仕
徒喜使我寬逋征令知道義士林服遺愛豈用吾詩評

書會別亭

西城路居人送客西歸處年年借問去何時今日扁舟
從此去春風吹花落高枝飛來飛去不自知路上行人
亦如此應有重來此處時

題舒州山谷寺石牛洞泉穴

皇祐三年九月十六日自州之

太湖過懷寧縣山谷乾元寺宿與道人文
銳弟安國擁火遊石牛洞見李翱習之書

聽泉久之明日復
遊乃刻習之後

水泠泠而北出山靡靡而旁圍欲窮源而不得竟悵望
以空歸

臨川文集卷十二

欽定四庫全書薈要卷一萬四千七百一

集部

臨川文集卷十三

宋 王安石 撰

古詩

泊舟姑蘇

崑山慧聚寺次孟郊韻

如歸亭順風

垂虹亭

張氏靜居院

丙戌五日京師作二首

答客

次韻唐彥猷華亭十詠

顧林亭

寒穴

吳王獵場

始皇馳道

柘湖

陸瑁養魚池

華亭谷

陸機宅

崑山

三女崗

太白嶺

禿山

贈曾子固

鮑公水

寄李士寧先生

僧德殊水簾

杭州脩廣師法喜堂

復至曹娥堰寄丁元珍

答曾子固南豐道中所寄

寄贈胡先生

得子固書因寄

寄虔州江陰二妹

登越州城樓

憶昨詩示諸外弟

泊舟姑蘇

朝遊盤門東暮出閭門西
四顧茫無人但見白日低
荒林帶昏煙上有歸鳥啼
物皆得所託而我無安棲

崑山慧聚寺次孟郊韻

僧蹊蟠青蒼莓苔上
秋牀露翰饑更清風
蕩遠亦香掃

石出古色洗松納空光久遊不忍還迫迓冠蓋場

如歸亭順風

春江窈窕來無地飛帆浩浩窮天際朝出吳川夕雲溪
回首喬林吹岸薺舵師高卧自嘯歌戲彼挽舟行復止
人生萬事反衍多道路後先能幾何

垂虹亭

三江五湖口地與天不隔日月所蔽虧東西渺然白漫
漫漫北斗浩浩浮南極誰投此虹蜺欲濟兩間阨中流

雜蜃氣欄楯相承翼初疑神所為滅沒在頃刻晨興坐
其上傲兀至中昊猶憐變化功不謂因人役今君持酒
漿談笑顧賓客頗誇九州物壯麗此無敵熒煌丹沙柱
璀璨黃金壁中家不慮始助我皆豪殖喟予獨感此剝
爛有終極改作不可無還當采民力

張氏靜居院

動者利進為靜者樂止居物性有偏得惟賢時卷舒張
侯始出仕所至多名譽老矣歸偃休買地斲荒蕪屋成

為令名名實與時俱南堂棲幽真晨起瞻像圖北堂畫
五禽游戲養形軀燕有諸賓庭學有諸子廬問侯年幾
何矯矯八十餘問侯何能爾心不藏憂愉問侯客何為
弦歌飲投壺問侯兒何讀夏商及唐虞高山填門戶洛
水遶階除疾於山水間結駟有通衢我念老退者古多
賢大夫留侯亦養生乃欲凌空虛閉門不飲酒豈異山
中臞疏傅稍喜客揮金能自娛不聞喜教子滿屋青紫
朱張侯能兼取勝事古所無褒稱有樂石丞相為之書

而我不自量聞風亦歌呼

丙戌五日京師作二首

北風閣雨去不下驚沙蒼茫亂昏曉傳聞城外八九里
電大如拳死飛鳥

二

浮雲離披久不合太陽獨行乾萬物誰令昨夜雨
北風蕭蕭寒到骨

答客

士常疑西伯何至羨里辱瞽鯀親父子尚脫井廩酷昏
主雖聖臣飛禍安可卜致命遂其志雖窮不為戮

次韻唐彥猷華亭十詠

顧林亭

野王所居也

寥寥湖上亭不見野王居平林豈舊物歲晚空杖屨自
古聖賢人邑國皆丘墟不朽在名德千秋想其餘

寒穴

神農列冰霜高穴與雲平空山澗千秋不出嗚咽聲山

風吹更寒山月相與清北客不到此如何洗煩醒

吳王獵場

吳王好射虎但射不操戈匹馬掠廣場萬兵助遮羅時
平事非昔此地桑麻多猛獸亦已盡牛羊在田坡

始皇馳道

穆王得八駿萬事得期修茫茫萬載間復此好遠游車
輪與馬跡此地亦嘗留想當治道時勞者尸如丘

柘湖

湖中有山生柘故名柘湖記
云秦有女入湖為神今有廟

柘林著湖山菱葉蔓湖濱秦女亦何事能為此湖神年
年賽雞豚漁子自知津幽妖窟險阻禍福易欺人

陸瑁養魚池

野人非昔人亦復水上居紛紛水中游豈是昔時魚吹
波浮還沒競食糟糠餘吞舟不可見守此歲月除

華亭谷

水行三百
里入松江

巨川非一源源亦在衆流此谷乃清淺松江能覆舟蟲
魚何所知上下相沈浮徒嗟大盈北浩浩無春愁

華亭
水自

大盈入松江
而北入海

陸機宅

故物一已盡嗟此歲年深野桃自著花荒棘自生鍼芊
芊谷水陽鬱鬱崑山陰俛仰但如昨遊者不可尋

崑山

世傳陸氏家生機雲
故名崑山言生玉也

玉人生此山山亦傳此名崖風與穴水清越有餘聲悲
哉世所珍一出受歌傾不如鶴與猿棲息尚全生

三女崗

吳王奭三
女於此

自古世上雄慷慨擅功名當時豈有力能使死者生三
女共一丘此憾亦難平音容若有作無力傾人城

太白嶺

太白龍從東南馳衆嶺環合青紛披煙雲厚薄皆可愛
樹石疎密自相宜陽春已歸鳥語樂溪水不動魚行遲
生民何由得處所與茲魚鳥相諧熙

禿山

吏役滄海上瞻山一停舟怪此禿誰使鄉人語其由一

狙山上鳴一狙從之遊相匹乃生子子衆孫還稠山中
草木盛根實始易求攀挽上極高屈指亦窮幽衆狙各
豐肥山乃盡侵牟攘爭取一飽豈暇議藏收大狙尚自
苦小狙亦已愁稍稍受咋嚙一毛不得留狙雖巧過人
不善操耒耨所嗜在果穀得之常似偷嗟此海山中四
顧無所投生生未云己歲晚將安謀

贈曾子固

曾子文章衆無有水之江漢星之斗挾才乘氣不媚柔

羣兒謗傷均一口吾語羣兒勿謗傷豈有曾子終皇皇
借令不幸賤且死後日猶為班與揚

鮑公水

村南鮑公山山北鮑公水高穴逗遠源泠泠落山嘴玉
色與飴味不可他味比竹樹四蒙密翠藤相披靡漫郎
昔少年幽居得之此臨窺若有遇愛歎無時已浮名未
汙染永矢終焉爾奈何中棄入長安十載風塵化舊顏
謹囂滿耳不可洗此水泠泠空在山

寄李士寧先生

樓臺高聳間晴霞
松檜陰森夾柳斜
渴愁如箭去年華
陶情滿滿傾榴花
自嗟不及門前水
流到先生雲外家

僧德殊水簾

淙淙萬音落石顛
皎皎一派當簷前
清風高吹鸞鶴唳
白日下照蛟龍涎
浮雲糝額自能卷
缺月琢鉤相與懸
朱門試問幽人價
翡翠鮫綃不直錢

杭州修廣師法喜堂

浮屠之法與世殊洗滌萬事求空虛師心以此不掛物
一堂收身自有餘堂陰置石雙帶嶮石脚立竹青扶踈
一來已覺肝膽豁况乃宴坐窮朝晡憶初救時勇自許
壯大看俗尤崎嶇豐車肥馬載豪傑少得志願多憂虞
始知進退各有理造次未可分賢愚會將築室返耕釣
相與此處吟山湖

復至曹娥堰寄丁元珍

溪水渾渾來自北千山抱水清相射山深水急無艇子

欲從故人安可得故人昔日此水上罇酒扁舟慰行役
津亭把手坐一笑我喜滿懷君動色論新講舊惜未足
落日低徊已催客離心自醉不復飲秋果寒花空滿席
今年却坐相逢處怊悵難求別時迹可憐溪水自南流
安得溪船問消息

答曾子固南豐道中所寄

吾子命世豪術學窮無間直意慕聖人不問閔與顏彼
昏何為者誣構來嘖嘖應逮犯秋陽動為人所歎不卹

我躬瘁乃嗟天澤慳令人念公卿煜煜趨王班泊無憫
世意狙猿而佩環愛子所守卓憂子不能攀永矢從子
游合如扉上鏤願言借餘力迎浦踈潺潺亦有衣上塵
可攀禪太山大江秋正清島淑相縈鬱四盼浩無主日
暮煙霞斑水竹密以勁霜楓衰更殷賞託亦云健行矣
非間闕相期東北遊致館淮之灣無為襲甯羸悠然及
温還

寄贈胡先生

并序

孔孟去世遠矣信其聖且賢者質諸書焉耳翼之先生
與予並世非若孔孟之遠也聞薦紳先生所稱述又詳
於書不待見而後知其人也歎慕之不足故作是詩

先生天下豪傑魁胃臆廣博天所開文章事業望孔孟
不復睥睨蔡與崔十年留滯東南州飽足藜藿安蒿萊
獨鳴道德驚此民民之聞者源源來高冠大帶滿門下
奮如百蟄乘春雷惡人沮服善者起昔時蹻跖今騫回
先生不試乃能爾誠令得志如何哉吾願聖帝營太平

補葺廊廟枝傾頽披旒發纒廣耳目照徹山谷多遺材
先收先生作梁柱以次構架桷與椽羣臣面向帝深拱
仰戴堂陛方崔嵬

得子固書因寄

始吾居揚日重問每見及云將自親側萬里同講習子
行何舒舒吾望已汲汲窮年夢東南顏色不可挹仁賢
豈欺我正恐事維繫嚴親抱憂衰生理賴以給不然航
江外天寒北風急無乃山路惡僕弱馬行澁孤懷未肯

開歲物忽如蟄，鳩來高郵住。巷屋頗卑濕，蓬蒿稍芟除。
茅竹隨補葺，苟云禦風氣。尚恐憂雨汁，故人莫在眼。屢
獨開中笈，忠信蓋未見。吾敢誣茲邑，出關誰與語。念子
百憂集，眺聽聊自放。日暮城頭立，徐歸坐當戶。使者操
書入時開，識子意如渴。得美涪驪駒，日就道玉手。行可
執舊學，待鐫磨新文。得刪拾重登城頭，望喜氣滿原隰。

寄虔州江陰二妹

貢水日夜下，下與章水期。我行二水間，無日不爾思。飄

若越烏北心常在南枝又如岐首蛇南北兩欲馳逝者
日已遠百憂詎能追生存苦乖隔邂逅亦何時女子歸
有道善懷見於詩庶云留汝車慰我堂上慈

登越州城樓

越山長青水長白越人長家山水國可憐客子無定宅
一夢三年今復北浮雲縹緲抱城樓東望不見空回頭
人間未有歸耕處早晚重來此地遊

憶昨詩示諸外弟

憶昨此地相逢時春入窮谷多芳菲短垣困困冠翠嶺
躑躅萬樹紅相圍幽花媚草錯雜出黃蜂白蝶參差飛
此時少壯自負恃意氣與日爭光輝乘閒弄筆戲春色
脫畧不省旁人譏坐欲持此博軒冕肯言孔孟猶寒飢
丙子從親走京國浮塵全並緇人衣明年親作建昌吏
四月挽船江上磯端居感慨忽自寤青天閃爍無停暉
男兒少壯不樹立挾此窮老將安歸吟哦圖書謝慶弔
坐室寂寞生伊威材疎命賤不自揣欲與稷契遐相希

旻天一朝畀以禍先子泯沒子誰依精神不離肝肺絕
背血被面無時晞母兄呱呱泣相守三載厭食鍾山薇
屬聞降詔起羣彥遂自下國趨王畿刻章琢句獻天子
釣取薄祿歡庭闈身著青衫手持版奔走卒歲官淮沂
淮沂無山四封痺獨有廟塔尤我魏時時憑高一悵望
想見江南多翠微歸心動蕩不可抑霍若猛吹飜旌旂
騰書漕府私自列仁者惻隱從其祈暮春三月亂江水
勁櫓健帆如轉機還家上堂拜祖母奉手出涕縱橫揮

出門信馬向何許城郭宛然相識稀永懷前事不自適
却指舅館接山扉當時髻兒戲我側于今冠佩何頽頽
况復丘樊滿秋色蜂蝶摧藏花草腓令人感嗟千萬緒
不忍蒼卒回驂駢留當開樽強自慰邀子劇飲毋子違

臨川文集卷十三